

L E T T R E

DV SIEVR DE LA
Miltiere, au Jeune Mon-
brun, trouuée parmy ses
papiers le iour qu'il a esté
mis à la Bastille.

(T. B. de la Miltiere)

M. DC. XXVII.

duplicate
not cataloged

LETTRE DV SIEVR

de la Miltiere, au Jeune Monbrun, trouuée parmy ses papiers le iour qu'il a esté mis à la Bastille.

MONSIEVR,
 L'arriue presentement de Villeroy, où l'on ne tient pas comme à Paris, les Anglois pour des chimeres. Ils descendirent le vingt-deuzième du courant dans l'Isle de Ré, avec plus de succes que nous n'eussions osé esperer, car pour vous dire la verité, si Dieu n'eust esté miraculeusement pour nous, l'entrée de cette Isle nous eust esté aussi funeste, que la sortie que nous en fîmes en six cens vingt-cinq.

LE retardement que Messieurs de

A ij

LA descente s'est passéé en ceste
forte:

LA flotte Angloise vint mouïller l'ancre dès le matin le leudy vingt-deuxieme du passé, à la rade de Ré, où apres auoir demeuré cinq ou six heures, toutes les ancres furent levées, & les canons en prodigieux nombre furent pointez vers la ter-

re , où parurent deux bataillons
d'infanterie , l'un commandé par
Boissonniere Capitaine au Regi-
ment de Champagne, & l'autre par
la Contamine aussi Capitaine audit
Regiment.

Deux cens chevaux estoient sur
leurs ailles , mais si fort auancez
vers les Anglois , qu'ils firét bien pa-
roistre qu'ils estoient François, c'est
à dire, plus amoureux du combat
que de l'ordre.

Les Anglois mirent trois batail-
lons à terre , les deux premiers de
mille hommes chacun, & le troi-
sième qui faisoit la bataille, de deux
mille.

La Caualerie Françoisse eut telle
haste de donner, que sans auoir at-
tendu la décharge de son Infanterie,
elle se mella dans ces premiers batail-
lons , & les rompit entierement,

voire mesme poussa si auant, qu'il y eut plusieurs Caualliers qui entre-
rent en poursuivant les Anglois,
dans la Mer, iusques passé les fangles
des cheuaux.

Les Anglois du troisiéme batail-
lon s'ouurirent, & firent iour à leur
Canon, qui tira si à propos & si vio-
lemment, qu'il mit en desordre les
troupes Françoises, & en tua ou
blessa dix-neuf des plus huppez &
des meilleurs hommes tant des vo-
lontaires que des Officiers du Re-
giment de Champagne.

Cependant nouueaux Anglois
descendirent des vaisseaux, & avec
pics & pàiles commenceants à re-
muer la terre, firent vn logement
à la faueur duquel le reste de leur
armée mit pied à terre.

Ils ont le lendemain descendu
vingt pieces de canon, & font estat

d'assiéger le fort sainct Martin, que Monsieur de Toyras escrit n'auoir pas assez de viures pour trois mois entiers.

l'apprehende fort ces marées de Septembre, & que les raisins nouveaux ne nous tuent plus d'Anglois que les ennemis. Je serois bien d'aduis si le Roy vouloit accorder la démolition du fort Louys, & celles des forts des Isles, que nous donnassions congé à ceste armée estrangere, qui n'auroit pas peu fait d'auoir deliuré la Rochelle de captiuité. Mais si on ne nous accorde ces conditions, les mieux sensez d'entre nous, estiment qu'il vaut mieux se donner à l'Anglois que de demeurer plus long temps en la seruitude où nous sommes reduits.

*LES NOMS DES
François ; Gentils-hommes
ou Officiers morts ou blessez,
sont,*

Le Baron de Chantal, mort.

Nauaille, député du Roy dans la
Rochelle, mort.

La Lande, bastard de Sainct Luc,
mort.

Montaigne, neveu de celuy qui a
fait les Essais, mort.

Rastinlerc, Capitaine au Regimēt
des Gardes, frere du Sieur de
Toyras, mort.

Hortodie, mort.

Sauuigny, mort.

*Officiers du Regiment de Cham-
pagne, morts ou blesez.*

Boissonniere, Capitaine, mort.

Contamine, Capitaine, blessé à
mort.

Luscinet, Capitaine, estropié d'un
coup de pique au bras.

Valiros, Capitaine, fort blessé.

Du Tertre, Lieutenant, mort.

Morillan, Enseigne, mort.

Manty, Lieutenant, un bras coupé.

Thibaut, Capitaine, fort blessé.

Montespin, Enseigne, blessé.

La Brou, Enseigne, fort blessé.

Balanfac, blessé.

LES nostres perdirent saint Blan-
cart, nostre cher amy, qui a couron-
né toutes ses belles actions de cette
derniere, dont il auoit esté l'entre-
preneur, & est mort l'executeur. C'est

vne perte plus considerable que
 n'auroit esté le gain entier des Isles.
 Douze Anglois des principaux chefs
 ont signalé ce combat par leur
 mort, & environ cinq cens Soldats
 de la mesme nation les ont suiuis.
 De simples Soldats François, il en
 fût peu tué, pource qu'ils se mi-
 rent à couuert du Canon. Voila
 comme l'affaire s'est passée. Je
 suis bien marry que ie n'entends
 quelque chose de vos quartiers
 qui puisse seconder les exploits
 Anglois, ne pouuant qu'avec
 honte, voir des Estrangers auoir
 plus de soin de nostre bien que nous
 mesmes. Je sçay qu'il ne tiendra à
 Monsieur de Rohan, ny à vous, que
 l'on ne face quelque chose de bon.
 J'en prie Dieu de tout mon pou-
 uoir, qui ne fera iamais espar-
 gné pour la cause, ny pour vous

tesmoigner que ie suis veritable-
ment,

MONSIEVR,

I'oubliais à vous dire, que le Cardinal de Richelieu est bien-heureux de n'estre plus Euesque, car il a tant mis de bagues en gage pour enuoyer des munitiōs aux Isles, qu'il n'y en reste pas dequoy donner la benediction Episcopale. Les plus zelez d'entre nous, prient Dieu que la Mer engloutisse sa personne comme elle fait son bien. Pour moy ie ne suis pas du nombre, car ie suis de ceux qui encensent les puissances.

Vostre tres-humble & tres-
affectionné seruiteur.
LA MILTIERE.

Handwritten text, likely bleed-through from the reverse side of the page. The text is extremely faint and illegible due to fading and the age of the paper. It appears to be organized into several paragraphs, with some lines possibly starting with capital letters or numbers. The ink is very light, making it difficult to discern specific words or sentences.



